

Ya unan hulat ni apostol Pablo kanlan ampaniwala kan Apo Jesu-Cristo ha Tesalonica

Paunan habi

Hêñ main namaalih kan apostol Pablo, kan Silas, haka kan Timoteo ha balayan Filipos, ay nanoro hila ha balayan Tesalonica. Ya balayan Tesalonica ay kapitolyo hêñ probinsyan Macedonia, ya mihay probinsya, ya angkasakopan lan taga-Roma. Main Israelita bayro ya main sinagoga ya pagsimbaan la kan Apo Namalyari. Bayro yan nanoro hi apostol Pablo hêñ tatloy allon pamagsimba. Impamwang na kanla no ay-êmêñ nakahulat ha Habi ni Apo Namalyari, ya kailangan yan matsi boy mabiyay oman, ya Mesias, ya Cristo, ya impangakon Mâmiligtas, ya pan-êngganan lan Israelita, haka hi Apo Jesu-Cristo ya nakatupad hêñ kaganawan ya impamwang ya tungkol ha Mesias, kabay hiya yan taganá. A lay na dapat êngganan hêñ kaatag. Magpalokop hila tana dayi kan Apo Jesu-Cristo êmêñ hila mapatawed haka madyanan hêñ biyay ya ayn angga hêñ kalamo ni Apo Namalyari. Ya kaatag kanlan Israelita, ay naniwala ha toro lan apostol Pablo. Main etaman ya kaatag Griego ya naniwala. Kabay nabuyot-buyot ay ampi-tsi-tsipon hila ha bali ni Jason, ya miha kanlan ampaniwala, ya ampanggilam toro lan apostol Pablo.

Amêhén, labay lan Israelita, ya a ampaniwala ha toro lan apostol Pablo, ya dakpên dayi hilan apostol Pablo. Hén namwangan lan Jason ya habayto, ay tambéng lan impalako hilan apostol Pablo ha balayan Berea, ta êmén hila a madakép. Nanoro hilan apostol Pablo etaman ha Berea, haka main mal-at ya taga-Berea ya naniwala ha toro la. Noa, hén nagilam lan habaytoy Israelita ha Tesalonica ya labay mandakép kanla, ya atsi hila ha Berea, ay nunta hila ha Berea, ta dakpên la dayi hilan apostol Pablo, noa, in-atél hi apostol Pablo hén kaatag kanlan ampaniwala ha toro na, ha balayan Atenas. Hilan Silas haka hi Timoteo ay nabalag ha Berea. Nanoro ya etaman hi apostol Pablo ha Atenas, haka main naniwala ha toro na tungkol kan Apo Jesu-Cristo. Hén nabuyot-buyot yay na bayro hi apostol Pablo, ay naglako yay na ha balayan Corinto. Hén atsi ya bayro ha balayan Corinto, ay naihipan nan hulatan hilay taga-Tesalonica ya ampaniwala kan Apo Jesu-Cristo. Habaytsi ya unan hulat na kanla.

Kabooan hén pinakalaman

Pahalamat haka pamandayêw 1:2-3:13

Ya pamimiyay ya ampamahigla kan Apo Namalyari 4:1-12

Ya malyari kanlan natsi haka kanlan angkabiay ha pag-orong lano ni Apo Jesu-Cristo 4:13-18

Ya pamangênggan ha pag-orong ni Apo Jesu-Cristo 5:1-11

Tawlin aral haka pangumusta 5:12-28

¹ Hiko hi Pablo, kalamo ko hi Silas haka hi Timoteo ya ampipangumusta kamoyu ya patêl

ha Panginoon ya atsi ha Tesalonica, ya angkapi-tsitsipon gawan ha ampaniwala kaw kan Apo Namalyari, ya Tatang tamo, haka kan Panginoon Jesu-Cristo.

An-ihalangin naêñ kaw ya dyanan kaw hêñ kapatêkbêkan nakêm, haka ingalwan kaw ni Apo Namalyari.

² Panay kay ampahalamat kan Apo Namalyari gawan ha paniwala yo, haka panay naêñ kaw an-ihalangin. ³ An-ipagpahalamat naêñ ya dyag yo, gawan paniwala yo, ya pamagpagal yo ha pamanawop ha kapareho yo, gawan pamanlugud yo, haka ya pamagtêeh yo ha ampanalanghang kamoyu, gawan angkasigurado yo ya mag-orong ya hi Panginoon tamon Jesu-Cristo.

⁴ Patêl ha Panginoon, anlugarên na kaw ni Apo Namalyari, ta muwang naêñ ya pinili na kaw hêñ mag-in kana, ⁵ ta ya Mangêd ya Habi ya ampaniwal-an naêñ, ay impamwang naêñ kamoyu ha kapangyarihan nan Espiritu ni Apo Namalyari. Hêñ atsi kay bahêñ, ay nahêlêk yo etaman ya pamimiyay naêñ ha ikakangêd yo. ⁶ Haka tinoto yo kay boy tinoto yo hi Panginoon. Ta dinanan yo man ya hadyay pamairap ubat kanlan a ampaniwala, ay tinanggap yo ya Mangêd ya Habi ya intoro naêñ kamoyu hêñ main kahiglaan ya ubat ha Espiritu ni Apo Namalyari.

⁷ Kabay hikaw ay nag-in alimbawa kanlan ampaniwala kan Apo Jesus ha probinsyan Macedonia haka ha probinsyan Acaya. ⁸ Alwan bêngat ha probinsyan Macedonia haka ha probinsyan Acaya, noa, ha ayri man ya logal ay namwangan

lan tawo ya Mangêd ya Habi tungkol kan Apo Jesus gawan pamimiyay yo haka paniwala yo kan Apo Namalyari. Kabay a naén kailangan habiên kanla ya tungkol kamoyu.⁹ Ta hila ya ampamipamwang no ay-êmên yo kay tinanggap. Hila êt ya ampamipamwang no ay-êmên yon intêgén ya pamagsimba yo ha alwan pêtêg ya diyos, ya mana yon pinuri, ta êmên yo simbaêh hi Apo Namalyari ya mantêg ya Diyos, ya angkabiyay.¹⁰ An-ipamwang la êt no ay-êmên yon pan-êngganan ya pamag-orong hên anak na, ya hi Apo Jesus, ya mangubat ha langit. Hiyay biniyay oman ni Apo Namalyari haka hiya etaman ya ampamiligtas kantamo ha parusa ya lumatêng ya ubat kan Apo Namalyari.

2

Ya pamaghuyo ni apostol Pablo ha balayan Tesalonica

¹ Patêl ha Panginoon, muwang yo ya a nahayang ya pamaniraw naén bahêh kamoyu ha Tesalonica, gawan mal-at ya naniwala hên nanoro kay. ² Muwang yo etaman ya hên atsi kay pon ha balayan Filipos,* ay minusmus kay haka haday pamairap kannaén. Noa, hên nilumatêng kay bahêh kamoyu ay pinataniêh ni Apo Namalyari ya nakêm naén, ta êmên naén naipamwang kamoyu ya Mangêd ya Habi na, main man mal-at ya kalamo yo ya nanalanghang kannaén.† ³ Kaptêgan taganá ya intoro naén kamoyu, ta ayn kay hên

* **2:2** Dyag 16:16-24. † **2:2** Dyag 17:5-10.

narawak ya ihip hēn lokoēn kaw. ⁴ Ta impakatsiwala ni Apo Namalyari kannaēn ya pamipamwang hēn Mangangēd ya Habi na. Kabay ya pamipamwang naēn ay alwan gawan kalabayan tawo, noa, gawan ha kalabayan ni Apo Namalyari ya ampakamwang hēn laman ihip tamo.

⁵ Muwang yo haka muwang ni Apo Namalyari ya a kay nanoro kamoyu gawan ampanapol kay hēn bandi, haka a naēn kaw dinayēw, ha naayang ya habi gawan main kay hēn labay kamoyu. ⁶ A naēn êt tinapol ya pamandayēw yo, o ya pamandayēw hēn kaatag. ⁷ Main kay man hēn tungkulon gawan hikay ay apostol ni Apo Jesu-Cristo, ay naaypa ya nakēm naēn hēn atsi kay bahēn. Malugud kay nanad hēn indo ya ampanayhay hēn mantēg nan anak. ⁸ Ha hadyay lugud naēn kamoyu, ay namipamwang kay hēn Mangangēd ya Habi ni Apo Namalyari kamoyu, haka a naēn in-imot ya biyay naēn ha ikakangēd yo. ⁹ Patēl ha Panginoon, muwang naēn ya a yo naliwaan, ya allo-yabi kay hēn nagpagal hēn nag-obra, ta êmēn a kay pabyat ha hinoman kamoyu hēn mamakan kannaēn, hēn atsi kay bahēn kamoyu hēn ampanoro hēn Mangangēd ya Habi ni Apo Namalyari.

¹⁰ Hikaw haka hi Apo Namalyari, ay ampamaptēg ya taganán ayn kapintasan ya pamakilamo naēn kamoyun ampaniwala ha Panginoon, ta hinonol naēn ya kalabayan ni Apo Namalyari hēn atsi kay bahēn kamoyu. ¹¹ Muwang yo êt ya ugali naēn bahēn kamoyu, ay nanad ugali hēn mangēd ya toa ha panoro hēn anak na. ¹² Ta ya dinyag naēn, ay tinoroan naēn

kaw hêñ mangêd, haka pinahigla naêñ ya ihip yo, ta êmêñ kaw magpakahipêg hêñ manyag kangêran, ya ikahigla ni Apo Namalyari ya ampanagyat kamoyu hêñ palokop kana, hêñ makilamo ha ayn kapantag ya karanganan na.

¹³ Panay kay etaman ampagpahalamat kan Apo Namalyari gawan namwangan yo, ya toro naêñ ya pinaniwal-an yoy na, ay alwan bêngat toro hêñ tawo, noa, kaptégan ya ubat kan Apo Namalyari. Habaytoy habi na ay ampam-i kamoyun ampaniwala hêñ kapangyarihan hêñ manyag kangêran. ¹⁴ Hikaw ya patêl ha Panginoon ya angkapi-tsi-tsipon, napaptégan ya ampaniwala kaw, ta hikaw man ay pinairapan lan kabalyan yo, ya nanad hêñ nalyari kanlan patêl ha Panginoon, ya angkapi-tsi-tsipon ha probinsyan Judea, ya pinairapan lan kapareho lan Israelita. ¹⁵ Hila bay, ya Israelita, ya namatsi kanlan namipamwang hêñ habi ni Apo Namalyari hêñ hato, haka amêhêñ pinatsi la êt hi Panginoon Jesus. Hila êt ya nangipaplag kannaêñ. Anhalanghangêñ lay kaganawan tawo haka hi Apo Namalyari. ¹⁶ Ta ambawalêñ la kay hêñ mamipamwang hêñ tungkol kan Apo Jesus kanlan alwan Israelita, ta êmêñ hila a mailigtas ha parusa ya lumatêng. Gawan nibunton ya karawakan la, ay nalatngan hilan huluk ni Apo Namalyari ta siguradon parusaan hila ha parusa ya lumatêng.

Labay ni apostol Pablo hêñ hirawêñ na hilan oman ya patêl, ya ampaniwala kan Apo Jesus ha balayan Tesalonica

¹⁷ Patêl ha Panginoon, naipêk man ya panaon hên nangapipapawa kitamo, ay panay naêñ kaw hên angkaihipan. Labay-labay naêñ kaw dayin mahêlêk oman gawan angkalêngêw kay kamoyu. ¹⁸ Labay naêñ dayi hên mag-orong kamoyu. Hiko man, kata-ungno kinan labay hên maniraw bahêñ, noa, panay a ampihundo gawan an-abalaêñ na kay ni Satanas. ¹⁹ Labay naêñ kaw hên hirawêñ, ta hikaw ya an-ikahigla naêñ, ta angkasigurado naêñ ya ihundo yoy paniwala yo. Hikaw ya maipagmahlay naêñ ha arapan ni Panginoon tamon Jesus ha pag-orong na di, gawan pinaniwal-an yoy toro naêñ. ²⁰ Taganán hikaw ya an-ikahigla naêñ, haka ya maipagmahlay naêñ.

3

¹ Kabay hên a naêñ matêêh ya kalêngêwan naêñ, ay nabalag kay tana ha balayan Atenas, ² ta in-utoh naêñ tana bahêñ kamoyu ya mihay patêl tamo ha Panginoon, ya hi Timoteo, ya ampaghuyó kan Apo Namalyari. Hi Timoteo ay kalamo naêñ ha pamitoro hên Mangêd ya Habi tungkol kan Apo Jesu-Cristo. In-utoh naêñ yan mamataniêh hên paniwala yo, haka mamahigla hên ihip yo, ³ ta nalatngan kaw man hên habaytoy pamairap, ay ayn dayi kamoyu ya maalihan paniwala. Ta muwang yo ya habayto ya pamairap, ay tinalagá ni Apo Namalyari kantamon ampaniwala kan Apo Jesu-Cristo. ⁴ Muwang yo ya habayto, ta hên atsi kay bahêñ kamoyu, ay mana naêñ hinabi ya malatngan kitamo hên pamairap, haka amêhêñ natupad ya habayto. ⁵ Kabay hên a kina nakatêêh

gawan panyagah ko hēn tungkol kamoyu ay, in-utoh ko hi Timoteo bahēn kamoyu ta êmēn ko mamwangan no nananiēh pon ya paniwala yo kan Apo Jesu-Cristo. Nampotog ako ta kayno natukso kaw ni Satanas, hēn itēgēn ya paniwala yo kan Apo Jesu-Cristo, haka kayno nahayang bēngat ya paytoro naêñ kamoyu hēn tungkol kana.

⁶ Amêhēn, nag-orong yay na hi Timoteo ya ubat bahēn, haka nantan yan mangēd ya balita ya tungkol ha paniwala yo, haka ha pamanlugud yo. Hinabi na êt ya panay yo kay hēn angkai-hipan, haka angkalêngêw kaw êt kannaêñ, êmēn ha angkalêngêw kay kamoyu. ⁷ Kabay, gawan panihundo yoy paniwala yo, ay mahiglay nay ihip naêñ, angkalatngan kay man hēn hadyay kairapan haka pamairap. ⁸ Gawan nakataniêh ya paniwala yo, ay mahigla ya biyay naêñ. ⁹ Ayn angga ya pagpahalamat naêñ kan Apo Namalyari ha pamahigla yo kannaêñ. ¹⁰ Allo-yabi ay panay naêñ kaw hēn an-ipaka-panalangin ya mahêlêk naêñ kaw dayi, ta êmêñ naêñ mapahanan ya paniwala yo.

¹¹ Dayi, hi Apo Namalyari, ya Tatang tamo, haka hi Panginoon Jesus ya mamaalih hēn am-pamahabkol kannaêñ ta êmêñ naêñ kaw mahiraw. ¹² Haka an-ihalangin naêñ kaw, ya dayi, ay pahanan hēn Panginoon ya pamanlugud yo ha miha ta miha, haka ha kaganawan tawo, hēn nanad ha pamanlugud naêñ kamoyu. ¹³ Ta êmêñ na pataniêhêñ ya ihip yo, êmêñ na kaw malatêng hēn ayn kapintasan ha arapan ni Apo Namalyari, ya Tatang tamo, ha pag-orong na di ni Panginoon tamon Jesus ubat ha langit, hēn kalamo na ya

kaganawan ya pinili ni Apo Namalyari hēn mag-in kana.

4

Ya pamimiyay ya ampakapahigla kan Apo Namalyari

¹ Patêl ha Panginoon, main kay pon êt hēn labay ipamwang kamoyu. Ampakihabi naêñ kamoyu ha tungkulan ya indin kannâen ni Panginoon Jesus, ya ipakahundo yo dayi ya intoro naêñ kamoyu ya tungkol ha pamimiyay yo, ya pandaygêñ yoy na, êmén mapahigla hi Apo Namalyari. ² Gawan muwang yoy na ya habaytoy intoro naêñ kamoyu ay ubat kan Panginoon Jesus. ³ Ta labay ni Apo Namalyari ya taganán ayn kaw hēn kasalanan, nanad ha mamabayi haka makilalaki. ⁴ Ya balang miha kamoyu ay dapat mangillag hēn lawini na ha karawakan, ta êmén kaw mamiyay hēn ayn ikarêng-êý ha arapan tawo, haka banal ha arapan ni Apo Namalyari. ⁵ Paan kaw panay hēn manghip hēn kalabayan lawini, hēn nanad kanlan a ampagpalokop kan Apo Namalyari. ⁶ Paan yon lokoén ya kapareho yo hēn tungkol ha ahawa na, ta impamwang naêñ ana kamoyu, ya hi Panginoon ay siguradon mamarusa ha manyag hēn êmbayro. ⁷ Ta pinili na kitamo ni Apo Namalyari êmén kitamo mamiyay hēn ayn kapintasan ha arapan na. A na kitamo pinili ta êmén manyag hēn karawakan hēn kalabayan lawini. ⁸ Kabay no an-araêñ yoy hata toro naêñ, alwan bêngat hikay ya an-araêñ yo, noa, an-araêñ yo etaman hi Apo Namalyari ya nam-i kantamo hēn Espiritu na.

⁹ Tungkol ha pamilulugud yon nagpalokop kan Apo Namalyari, ay a kinan kailangan ihulat kamoyu, ta tinoroan na kaw na, ya dapat kaw milulugud. ¹⁰ Haka ampanlugud kaw na ha kaganawan patêl ha Panginoon ha boon probinsyan Macedonia. Êmbayro man, ay ampakihabi naêñ kamoyu ya pahanan yo pon ya pamanlugud yo kanla. ¹¹ Pakikwanan yon mamiyay hêñ mapatékbék. Paan kaw makiémén ha biyay hêñ kaatag, noa, magpakahipég kaw, hêñ nanad ha intoro naêñ kamoyu. ¹² Ta no daygên yoy habayto, ay a yoy na kailangan hêñ kikwa ha kaatag, haka galangên la kaw hêñ a pon nagpalokop kan Apo Namalyari.

Ya malyari kanlan natsi haka kanlan angkabiyay ha pag-orong lano ni Apo Jesu-Cristo

¹³ Patêl ha Panginoon, labay naêñ hêñ mamwangan yo ya kaptégan ya tungkol kanlan natsi ya naniwala kan Apo Jesu-Cristo, êmén a kaw maglungkot hêñ nanad kanlan ayn kasiguradoan ya mipalako hila ha biyay ya ayn angga hêñ kalamo ni Apo Namalyari. ¹⁴ Ampaniwala kitamo ya hi Panginoon Jesus ay natsi haka biniyay oman. Êmbayro êt, ampaniwala kitamo ya biyayêñ oman ni Apo Namalyari ya hilay natsi ya naniwala kana. Bayo ipalamo na hila kan Apo Jesu-Cristo ha pag-orong na di ha luta.

¹⁵ Ta habaytsi ya hinabi hêñ Panginoon, ay anitoro naêñ kamoyu amêhêñ, ya hikitamoy angkabiyay pon, ha allon pag-orong na di, ay a minuna kanlan natsi hêñ manupa kana. ¹⁶ Ta kanan

habayto, ay muna-oy ya Panginoon ubat ha langit hēn kalamo hēn makhaw ya utoh, hēn baēg hēn miha kanlan pinakapoon hēn anghel ni Apo Namalyari, haka ya tonoy hēn tambuyok ni Apo Namalyari. Ha pantumaoy ni Apo Jesu-Cristo ay munan mabiyay oman, hilay natsi ya nagpalokop kana. ¹⁷ Bayo hikitamo ya angkabiyyay pon ay tsiponēn ha lēmm hēn kalamoy biniyyay nan oman hēn palako ha langit hēn manupa kana. Kabay paubat habayto, ay makapaidi kitamina ha langit hēn kalamo hēn Panginoon hēn angga-angga. ¹⁸ Habaytsi ya toro ay ipaihip yo ha miha ta miha, êmēn kaw mangapipapahigla.

5

Panay kitamon maglēan ha pag-orong ni Panginoon Jesu-Cristo

¹ Patēl ya ampaniwala ha Panginoon, tungkol ha pag-orong hēn Panginoon ay a naēn kailangan hēn ihulat kamoyu no makano yan mag-orong, ² ta muwang yoy na, ya a tamo muwang no makano yan mag-orong, ta ya pag-orong hēn Panginoon ay nanad ha pamanlumatēng hēn mihay manakaw ya biglan lumatēng. ³ Habaytoy allo ay habiēn lan a ampaniwala, ya ayn nanan gulo haka ayn nanan ikapotog, noa, kanan habayto, ay namakonkaynaman ay lumatēng kanla ya kapuraan ya ayn angga. A hila makapuwayu, ta siguradon lumatēng ya hata parusa, ya nanad ha siguradon mananam hēn ilab ya mihay babayi ya nabuktot, bayo ya manganak. ⁴ Noa, hikaw ya patēl ha Panginoon, ay a kaw na ampanyag

hēn karawakan ta ayn kaw na ha kariglēman. Kabay a kaw mabigla, bigla man ya pag-orong na, ya nanad ha pamanlumatēng hēn manakaw ya taganán bigla. ⁵ Hikaw ngan ay atsi ha kahawangan, hēn nanad angkahawangan allo. Ayn kitamina ha kariglēman hēn nanad kariglēman hēn yabi. ⁶ Kabay dapat panay kitamon nakal-an. Dapat panay kitamon nakamukat hēn nakal-an alwan nanad kanlan atsi ha kariglēman ya a nakal-an. ⁷ Ta hilay nabêlêw ay angkabêlêw ha yabi, haka hilay mapamminêm alak ay maglahing ha yabi. ⁸ Hikitamo, ya nanad angkabiyay ha allo, ay dapat panay kitamon nakal-an hēn manyag kangéran. Dapat tamon pakataniêhēn ya paniwala tamo, haka pahanan ya pamanlugud tamo ya nanad ha kalahag ya ampamiillag kantamo ha karawakan. Dapat tamo êt hēn ihundo ya paniwala tamo ha kasiguradoan hēn biyay ya ayn angga, ya nanad halimbêng hēn ulo tamo. ⁹ Ta a na labay ni Apo Namalyari ya maparusaan kitamo. Pinili na kitamo ta êmēn na kitamo iligtas ni Panginoon tamon Jesu-Cristo ha parusa. ¹⁰ Natsi ya gawan kantamo, ta êmēn na kitamo ilamo ha biyay ya ayn angga. Ha pag-orong na di, gêtan na kitamo ha langit, angkabiyay kitamo man o natsi. ¹¹ Kabay mipapahigla kaw haka mipapataniêh kaw hēn paniwala hēn miha ta miha, ya nanad hēn andaygêñ yoy na.

Kaatag pon ya aral haka pangumusta

¹² Ampakihabi naêñ kamoyun patêl ha Panginoon, ya igalang yo hilay pinili ni Apo Namalyari ya ampagpagal hēn mamaala haka manoro

kamoyu. ¹³ Pakalugurên yo hila hêñ main galang gawan ha pamagpagal la. Milalamo kaw hêñ magpakaaypan nakêm ta êmêñ mag-in mimiha ya ihip yo.

¹⁴ Amêhêñ, ampakihabi naêñ kamoyun patêl ha Panginoon, ya habyanan yo hilay mabarog ta êmêñ hila humipêg. Pahiglaêñ yoy nakêm lan ampanyagah. Pakataniêhêñ yoy ihip lan kinumbêl ya paniwala. Pibat-an yo hilangan hêñ main kaaypaan nakêm. ¹⁵ Alwa yon tumbahan narawak ya ampanyag kamoyun narawak, noa, panay kaw manyag hêñ ikakangêd hêñ miha ta miha, haka ha kaganawan tawo.

¹⁶ Panay kaw maghigla. ¹⁷ Panay kaw hêñ man-alangin. ¹⁸ Panay kaw magpahalamat, ha hinoman ya angkalyari, ta habaytoy kalabayan ni Apo Namalyari kantamon ampaniwala kan Apo Jesu-Cristo.

¹⁹ Alwa yon habkolêñ ya an-ipadyag nan Espiritu ni Apo Namalyari kamoyu. ²⁰ Alwa yon musmusêñ hilay ampamipamwang hêñ an-ipaihip kanla ni Apo Namalyari. ²¹ Êmbayro man, ay pakaihipêñ yo pon ya toro la haka honolêñ yoy nay mantêg ya ubat kan Apo Namalyari. ²² Haka dayuán yoy kaganawan karawakan.

²³ Amêhêñ, an-ihalangin naêñ kaw, ya pataniêhêñ na kaw ni Apo Namalyari ya ampamin kapatêkbêkan ihip, ta êmêñ yo dayuán ya kaganawan nangarawak. An-ihalangin naêñ êt ya illagan na kaw, ta êmêñ ha pag-orong na di ni Panginoon tamon Jesu-Cristo, ay ayn kaw hêñ kapintasan ha boon pagkatawo yo, ha espiritu yo,

ha kaêlwa yo, haka ha lawini yo. ²⁴ Haka muwang naên ya tapat hi Apo Namalyari ya namaihip kamoyu hêñ magpalokop kana, kabay daygêñ nay hata inhalangin naên kana.

²⁵ Patêl ha Panginoon, ihalangin yo kay êt.

²⁶ Mikukumusta kaw ta êmêñ ipahlêk ya paman-lugud yo ha miha ta miha hêñ nanad patêl ha Panginoon.

²⁷ Ampakihabi ko kamoyu ha langan ni Panginoon Jesu-Cristo, ya bahaêñ yoy hata hulat ha arapan lan patêl tamo.

²⁸ Panay atsi kamoyu dayi ya ingalo ni Panginoon tamon Jesu-Cristo.

**Ya habi ni apo namalyari: Bayon tsipan - Ayta
Mag-antsi
New Testament in Ayta, Mag-antsi**

copyright © 2006 Wycliffe Bible Translators, Inc.

Language: Mag-antsi Ayta (Ayta, Mag-antsi)

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2006, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789718260654

The New Testament

in Ayta, Mag-antsi

© 2006, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 11 Nov 2022 from source files
dated 29 Jan 2022

d2289d90-e8af-5f04-a1e1-312fd0921aff